

Chinto Geerman:

FAMIA Y TRABAO: SU RESPONSABILIDAD MAS GRANDI!

NOS HENDENAN Special

Pa. Mercedes Abdul

Nos "Hendenan Special" tin como invitado awe, señor Jacinto Geerman, Account Manager di Caribbean Mercantile Bank unda e tin casi 32 aña trahando. Chinto, manera e ta worde cariñosamente yama, no solamente ta un bon trahador, pero un excelente persona cu ta stima su famia masha hopi mes. E ta kere den e desarojo personal a traves di cursonan, y den un bon relacion cu coleganan di trabao pa mantene un armonia laboral. Tambe e ta amante di lectura.

ESTUDIO: Señor Geerman a sigui su enseñanza basico na St. Jozef School na Santa Cruz, despues a bay Sint Dominicus College unda el a haci su MULO.

TRABAO: Despues cu el a haya diploma di MULO el a bay traha na LAGO, cu apenas 18 aña di edad.

"Mi a bay Lago unda mi a cuminsa traha den e departamento di "Oil Accounting". Despues mi a bay traha na Marine Office te dia cu mi a sali for di LAGO na aña 1963.

E tempo ey mi a tende cu despues cu Maduro & Curiel's Bank a caba di establece un sucursal na Aruba, cu e mesun nomber Maduro & Curiel's Bank Aruba N.V, mi a bay solicita

ayanan. Mi a ingresa e mesun aña y a keda te awe. Na Juni awor lo mi cumpli 32 aña trahando cu Caribbean Mercantile Bank, nomber cu e banco a adopta for di final di 1963".

Trahandu na LAGO Chinto a sigui varios curso di Accounting y correspondencia, manera Ingles, y den su oranan liber tambe el a tuma cursonan di Hulandes.

NA C.M.B.: Na Caribbean Mercantile Bank tambe señor Geerman a sigui cursonan tanto na Aruba como na Curacao.

"Mi a gusta e trabao na C.M.B unda semper mi a mantene un bon comunicacion cu mi superior y coleganan. Mi a traha den diferente departamento, en-

tre otro, Collection, Administracion, Fianza Personal, y tambe maneha Caribbean Credit Corporation, den e añanan 70.

Actualmente mi funcion ta Account Manager, cual ta un trabao di hopi responsabilidad, specialmente tratando cu cliente no solamente pa haya nan pero pa preserva nan. Mantene bon relacion cu nan. Mayoria di nan ta clientenan local, ta nos mes hendenan".

SATISFACCION: E satisfaccion mas grandi di Sr. Geerman su trabao ta di por cumpli cu su responsabilidadnan.

"Un di e cosnan importante cu ta resalta di bo trabao ta pa bo ta bon sosega fisica y mentalmente cada dia bo por cumpli cu bo responsabilidadnan di trabao debidamente. Esey ta un conseho cu semper mi a duna mi yiuunan.

Ora bo cumpli cu bo responsabilidad di trabao bo ta genera hopi confianza den esnan cu bo ta trata cu nan y tambe di bo superioriornan. Un di e puntonan tambe cu semper mi a trata y mi ta spera cu mi a cumpli cune ta di mantene un bon relacion y comunicacion cu mi coleganan, pa crea un bon armonia den e ambiente di trabao".

GUIA PA COLEGANAN: Sr. Geerman ta conta nos cu diferente biaha el a duna guia na empleadonan nobo.

"Semper nan a acepta mi ayudo y consehonan. Duna guia na empleadonan nobo,

ora cu ta necesario, ta similar na un maestro cu ta duna les na su alumnonan. Despues lo keda un relacion estrecho y aprecio entre ambos persona".

Señor Geerman ta conseha tur hoben pa nan tuma cursonan pa nan propio desarojo, y pa nan progresa den nan trabao.

FAMIA: Señor Geerman ta un persona hopi hogareño. Pe su famia ta algo hopi special. E ta relata tocante esaki. "Famia pa mi semper tabata algo hopi importante. Semper mi tabata hopi pega cu mi mayornan tempo cu nan tabata na bida, y ainda mi ta hopi liga cu mi rumannan. Tambe cu mi casa y mi yiuunan, y awor cu e tercer generacion cu ta mi nietonan.

E valor di un famia ta pa mantene nan den un bon union, y comparti momentonan bon y momentonan difícil.

Un relacion asina ta duna hopi alegria y bo ta mira e frutonan despues.

Semper mi a duna mi yiuunan hopi conseho, tambe pa nan sigui cursonan pa upgrading y exito di nan trabao, y mi ta satisfecho cu nan a logra esey".

PASATEMPO: Chinto ta gusta lesa buki y esaki tambe ta un di su consehonan pa esnan mas hoben.

"Lesamento ta un fuente pa conocimiento. Mi ta spera cu nos hubentud ta haci uso di e facilidadnan cu tin y cu ta brinda oportunidad pa nan lesa. Por ehemplo e facilidadnan cu Biblioteca Nacional ta brinda".

